

Tā îgî-îgî Póólô kâ Fîlēmónā drí Fîlēmónā

Tā 'ě'á zîlá nîlí sîsî rî

Póólô îgî wárāgā nô ní íyî rû-lě-āzî Fîlēmónā gólâ â'dô 'bá rāgîî bē dūû rî drí. Tā ífî Póólô drí wárāgā nô îgîzô nô, tâlá rāgîî Fîlēmónā kâ ālô, rú bē Ōnēsímô rî rā trá volé, gō'dá â'dô trá krístô 'bá ró. Póólô lě Fîlēmónā ô'ě ró tâ Ōnēsímô drí ôzô gólâ rî âdrúpî krístô 'bá ró rî tí, ôzô Ōnēsímô ôgô trá volé gólâ ngálâ rî.

1¹⁻² Mâ Póólô îgî wárāgā nô ní drí Fîlēmónā gólâ â'dô 'bá âmâ ngá 'ě 'bá āzîyā ró. Âmâ Tîmátîyā yî bē, mâ 'ě nî-bē-yā ānî drí ānî ôkô Āpîyā gō'dá kpá Ārîkîpô gólâ rî 'bá kpá tâ Ôvârí kâ âtî-âtî rî pēlé, gō'dá ndrî 'dó ôjîlá Ôvârí kâ rû 'ě'bé 'bá vō ālô 'á ní drí 'bā 'álâ rî 'bá yî bē. Ôzô ānî drí nîlí rî kâtî, ngbāāngbānô rî, mâ rî'á ômbē-ômbē ró gānîmā 'á, tâlá má 'dē trá Yēsū Krístô vósî. ³ Ôvârí âmâ átá ró gō'dá Kúmú âmákâ Yēsū Krístô bē, ôfē ôrē ānî drí tâ 'dî bē.

Tā Póólô drí āwô-ítî 'ězô Ôvârí drí Fîlēmónā rî tāsî rî

⁴⁻⁵ Fîlēmónā, âmâ āzî-āzî tândî 'dî, ãtú-pá vósî cé má ôtîrî rîî āwô ngólé Ôvârí drí rî, má rî kpá zāâ rî'á āwô-ítî 'ělé Ôvârí drí ānî tāsî, tâlá má ârî trá kî nî rî, nî Fîlēmónā rî'á ôjîlá Ôvârí kâ rî 'bá yî lôvô lâ bē dūû ní 'á, gō'dá kpá ní lě tâ ānîkâ trá Kúmú âmákâ Yēsū 'á. ⁶⁻⁷ Nî îcî krístô 'bá lîfî trá dūû úlî âtâ-âtâ sî gólîyî drí tâ lēlē ānîkâ Ôvârí 'á rî sî. 'Dîî 'bā mâ trá â'dólé āyîkô ró āmbá. Ítî rî, má ngô āwô Ôvârí drí kî nî rî, ôzô ní ôtîrî tâ rî 'dî 'ěē rî, ní nî ró bē tâ tândî ndrî tîbē Yēsū Krístô drí rî'á 'ělá âmâ drí rî yî.

Tā Ōnēsímô rî tāsî

⁸⁻⁹ Má â'dô kpálé mbârākâ bē tâ 'bālē ní drí Yēsū Krístô ngá lésî rî, má â'dô ānî îjî'á cé ālô tâ fînyáwá tāsî, tâlá âmâ rî'á ní bē āzî-āzî ró. Mâ Póólô rî'á āgô ārākâ 'î, gō'dá mâ kpá rî'á gānîmā 'á, tâlá má drí 'dēzô Yēsū Krístô vósî rî tāsî. ¹⁰ Âmâ nyānyā lō'bā rú'bā ní drí tâlá âmâ mvá Ōnēsímô rî tāsî. Gólâ 'bā tâ trá tâ lēlē Yēsū 'á, tâlá tâ má drí âtalé trá gólâ drí, má drí â'dózô drē ākpākâ'dā gānîmā 'á nólé rî sî rî. ¹¹ Ōnēsímô ôzô â'dô kpálé trá rāgîî ānîkâ î'dî ākû ró rî, gólâ pá ní kô āmbá. Gō'dá ngbāāngbānô rî, gólâ â'dô âmâ pā'á cú kpārāfî ní bē.

¹² Ôzô â'dô kpálé îzā kōkō âmákâ kî'á nî rî, gólâ âbí âmâ âyē'á nō î'dî rî, má âbí gólâ rî jō'á lôgólé ní ngáá tólâ. ¹³ Má lē gólâ trá â'dólé rîlî má bē nólé, â'dô ró bē gólâ drí rîzô rî'á âmâ vó ndrēlē. Mâ drē gānîmā 'á nō, tâlá tâ âtî-âtî Ôvârí kâ tāsî. Gólâ rî âmâ pālē 'dî, tâlá nî yû'dāwā âmâ pālē nólé rî drí sî. ¹⁴ Ôzô má ôlē rāgîî ānîkâ 'dî kpálé rîlî má bē nólé rî, â'dô kô mbî má drí 'ělé kôrô îtî lâ 'dî ró cú îtî ní drí tâ-drî lâ 'dî lē ākô. Ítî rî, ní 'ě tâ â'dô 'bá mbî rî î'dî má drí Ōnēsímô rî tāsî, tâlá ní lē 'ělá.

¹⁵ Tā ãsû âmákâ ní drí rî rî'á kî nî rî, ôzô Ōnēsímô drí ānî âyērē trá párá fînyáwá sî, gō'dá nō gólâ âbí gō'á ní ngálâ zāâ gbādú 'dî. ¹⁶ Gólâ gōó 'dî kô â'dólé rî'á 'ělá cé rāgîî ró. Nî ãsû tâ gólâ rî tāsî âdrúpî ní drí lôvô lâ 'bālē rî ró. Gō'dá âmâ nyānyā 'bā gólâ rî lôvô bē trá rî, ní gō ní 'bā gólâ rî lôvô kpá rōô āzî-āzî ró gō'dá kpá krístô 'bá āzî ró. ¹⁷ Ôzô má â'dô fî pāfîî ānî āzî-āzî 'î rî, ní lāgû Ōnēsímô rî nō kpá té ôzô ní drí âmâ lāgûrî rî kâtî. ¹⁸ Ôzô ngátá gólâ ũûgû ngá 'î ní drîgá sî tólâ yā rî, má â'dô ngá rî drîlá ũgûlî trá 'dî vō lâ fē'á lôgólé ní drí. ¹⁹ Mâ Póólô má îgî âmâ rú nō tâ 'bā'bā ró ní drí kî'á nî rî, má â'dô ngá rî 'dî fē'á lôgólé ní drí. Ngá ānîkâ má bē 'dî rî'á cé fînyáwá îtî, 'dôvô ní âyē, má pē drē tâ kpá ândalé ní drí kî nî rî, má 'ě tâ āngî trá ní drí gārā tâ lāfâ 'dî kâ drîî sî, má drí lāfî tâ lēlē kâ Yēsū 'á rî â'dázô ní drí rî tú.

²⁰ Âmâ âdrúpî, má îjî ní âmâ pālē nō, tâlá âmâ kpārāfî ní bē tâ lē 'bá Kúmú âmákâ Yēsū 'á. Ítî rî, ní ājô Ōnēsímô volé má ngáá nólé. Tā 'dî â'dô âmâ 'bā'á â'dólé āyîkô ró. ²¹ Má rî rî'á wárāgā nô îgî'á nō ní drí. Gō'dá má nî trá kî nî rî, ní â'dô tâ má drí îjîlî rî 'ě'á.

²² Áâ'dô âmâ înjî'á gānîmā 'ásî, tâlá nî rî'á āwô ngō'á Ôvârí drí âmâ tāsî. Á'dô bē îtî rî, ní êdē vō má drí nîzô rîlî 'á lâ ní bē ũmú ró tākô.

Nî-bē-yā Póólô kâ ôjîlá drí

²³ Ēpāfārasî kpá bē rî'á má bē nólé gānîmā 'á, tâlá gólâ 'dē kpá Yēsū Krístô vósî. Gólâ 'ě nî-bē-yā āmbá ānî drí.

²⁴ Âmâ ngá-lě-āzîyā yî, Mārākô, Ārîsîtarókô, Dēmásî, gō'dá kpá Lúkâ yî bē, 'ě îyî nî-bē-yā kpá āmbá ānî drí tólâ.

²⁵ Kúmú Yēsū Krístô ô'bā íyî drî ānî drîî. Ídî 'dî.